

**Páwòlò cu wáràgà jì ndâ mbe kû
kili ta ɾè mî Bìndi-Mbírì gbí
gbata
FÌLÍPÌ**

¹ A ze tí ndâ Páwòlò ta Tímàtéyò, tí ndâ bòò mî Bìndi-Mbírì tí Jézù ká kû cu wáràgà tí nó jì ndâ tó 'duù mî Mbírì mbe 'vala toko ta Bìndi-Mbírì tí Jézù gbí gbata Filípì. Ze kû cu wáràgà tí nó jì yo ta ndâ kpo-kpò 'duù kùro yo, ta ndâ 'duù tí nó mbe kû konì ndâ kpo 'duù kùro yo ta nètè yo, tí ndâ mbe kû kili ta ɾè mî Bìndi-Mbírì kà nó 'dáá gî.

² Ze kû cu wáràgà tí nó ta bà 'deke tí ze jì Mbírì tí Bu ndoo, delè ta bà 'deke tí ze jì Mbe tí ndoo Jézù tí Bìndi-Mbírì, máa, ndú 'ví bàkà nambeè jì yo, ndú delè 'ví sî 'bí i 'ví ba muu yo lá.

Páwòlò 'deke tí wó jì Mbírì tacó tí ndâ mbe 'deke wáràgà tí nó

³ Ye tí Páwòlò ta o 'dáá gî kû 'dè nìkì maa jì Mbírì mî ye ta o tí nó náa ye má kû koɾo có tí yo.

⁴ Ye ta o 'dáá gî kû 'deke tí ye jì Mbírì tacó tí yo ta líkí'ò tí ye.

⁵ Tàkòcò ye delè peteke gítí yo ngé ma, tacó bà dù yo tí ndâ mbe konì ye ta bà je wotí jì ye gítí bà ma Banga-Ngú-Có 'do tí o bà 'bìtà bà 'di Banga-Ngú-Có mî yo, yee gbí ɾi tí nó wúnó nò.

⁶ Ye nò ni gî, máa, Mbírì tí mbe 'bìtà bà tè kùro yo tí kpokèjì tí nò nó bà tè kùro yo yee tí o bà gî

yo tí ndâ 'dóó ñìnó mì wó ta ɾi bà gì Bìndi-Mbíri tí Jézù wúnò gî.

⁷ Áá mì ye a yúco tacó bà dù ta tàkòcò ye pétékè'i gítí yo éno, tacó có tí yo ta o 'dáá gî kuu gbí njembí ye, tacó yo a ndâ ka ye, náa Mbíri kú bàkà nambeè ji ndoo ta ndoo kpónó si ye kuu gbí zàà nô. Yí delè táánò bàkà nambeè ji ndoo ta ndoo ta o tí nó náa ye táánò kuu sè, kú tì muu Banga-Ngú-Có, ta bà 'dè ndâ có ñìnó náa à tí á gítí nô.

⁸ Mbíri ñò ni gî, máa, kô'o tí yo 'dáá gî bà zi ye gî. Tàkòcò ye peteke gítí yo 'dáá gî ká go bà peteke tàkòcò Bìndi-Mbíri tí Jézù gítí yo.

⁹ Ye kú 'deke tí ye tacó tí yo ji Mbíri éno máa, yo ta o 'dáá gî 'ví zè tí yo gbí òkò tí yo ñìkì túkà'i. Yí delè 'ví je cèe muu tacó bà 'viiki gbí có ji yo.

¹⁰ Tacó wàa, yo 'ví dù tí ndâ 'duù ñìnó ta bà lê tí yo wálá nó kú ù ta ndi o bà co ɾi bà gì Bìndi-Mbíri,

¹¹ tí ndâ 'duù mbe 'de tó i tí nó náa Jézù bà gì tí nó me gbolò. Tó i tí nó tí bà dù jáá kuro Mbíri, tacó bà wu ɾè Mbíri, ta bà ùlù yí nô.

'Válá a Bìndi-Mbíri

¹² Có tí nó ta go bà 'dè ji yo tí ye nó a có gítí i tí nó mbe 'de ye nô, ndâ ná'vindí. I tí nó tí bà te ye mí gbí zàà nó njaanga a kpokèjì bà ma Banga-Ngú-Có ji ndâ 'duù.

¹³ Tacó ndâ àsikèrì mbe kú kpolo tí 'bá mì ngáángbá gba mì ndâ Rómánò 'dáá gî, ta sè ndâ 'duù gbí gbata Rómà 'dáá gî, kpónó ñò ni gî, máa, à te ye mì gbí zàà nó a i muu Bìndi-Mbíri.

14 Bà dù ye gbí zàà nó kù yù a njembí ndâ 'bí ná'vindí ndoo gítí bà koṛo có lli mítí Mbe tí ndoo. Ndú kpónó kù ma có mì Bìndi-Mbíṛì ta gúku tí ndú wálá.

15 À dú káa yúcó, máa, a go bà tò kii, ta go bà gbòò'bè ta ye ká kù te ndâ 'bí 'duù gítí nèté bà ma có gítí Bìndi-Mbíṛì. Káa ndâ 'bí 'duù kù bàkà 'do gbí có mì tó njembí.

16 Ndâ 'duù ñinó mbe kù bàkà 'do gbí có mì tó njembí nó kù bàkà tacó ndú zè ye ñikì maa. Ndú delè kù bàkà tacó ndú ñò ni gí, máa, à te ye mí gbí zàà nó a i tacó bà tì muu Banga-Ngú-Có.

17 Káa ndâ 'duù tí nó mbe kù ma có gítí Bìndi-Mbíṛì tacó bà tò kii ta ye, delè tacó bà gbòò'bè ta ye nó, kù bàkà káa 'dóó nèté mì ndú gítí mīṛì ndú. Ye tà kpētí má kù 'de gbí zàà káa káa kpo se muu gbí ndâ i tí ñò náa ndú kù bàkà ñò, ñinò a i ñinó mbe ñikì tí ndú.

18 Káa à 'dáá ñò me có ji ye ká ñò lá! Tacó 'bè gbí òkò tí ndâ mbe tīṛì ta ndâ mbe tó njembí kùṛo ye wálá. Tàkòcò ye kù peteke gítí ndú 'dáá gí ká dúú kù ya tí, tacó ndú 'dáá kù bàkà káa nèté bà ma có gítí Bìndi-Mbíṛì.

À éno! Tàkòcò ye ta o 'dáá gí ká pétékè'i,

19 tacó ye ñò ni gí, máa, bà 'deke tí yo ji Mbíṛì, gii je bà konì tí mì Bèṛi-mi-Jézù tí Bìndi-Mbíṛì, bà 'vala ye gí.

20 I ñinó ta go tí ye ngé má, tí i ñinó náa ye kpónó kù koṛo có lli mítí nó, a có máa, 'bí i 'ví te gúku mítí ye lá, ye 'ví dù ta yú njembí ye kpónó á go ñinó cóó-cóó ñò. Tacó wàa, ndâ 'duù 'ví ùlù ta Bìndi-Mbíṛì á 'do gbí có mì ye. À má a ku, a

ku! À má a 'válá, a 'válá!

²¹ Káa à má gítí ye, i tí nó náa a kù nì 'válá mítí nó, tacó tí ye a Bìndi-Mbíri. Káa ye bà 'de i gbí bà cì ye me gbolò.

²² Káa 'bí có a ònó máa, ye má kù bàkà a nèté ònó náa à tí nó, ye 'ví je a 'válá, wèè, ye 'ví je a ku wè?

²³ Ye kpónó yee tí bà njèè kpokèjì mì ndâ 'válá ta ku gî, káa ye ò 'dóó kpokèjì ònó náa ye 'ví co tí nó ni lá. Go bà co tí kpokèjì mì ku, wàa ye 'ví ya gí mì ze ta Bìndi-Mbíri tí ye ndii go bà co tí kpokèjì mì 'válá gî.

²⁴ Káa ye koṛo có máa, yo bà 'de i me gbolò a i 'do gbí bà 'vala ye.

²⁵ Njìnò a i ònó náa ye ò ni ngbárángà'i gî nó ká nò. À má éno, ye bà co tí kpokèjì mì 'válá. Ye ò ni gî, máa, ye bà dù tí wuù tacó bà konì yo 'dáá gî, tacó wàa yo 'ví tee njembí yo mítí Bìndi-Mbíri ta peteke tàkòcò yo dúú kù ya tí.

²⁶ Bà dù ye tí wuù, tacó wàa ye 'ví dele ta ndi ye ya gí mì yo nò, 'ví dù ji yo tí gbolò nderè bà ùlù Bìndi-Mbíri tí Jézù.

²⁷ Yo ta o 'dáá gî 'ví kù' bà á 'do tí ndâ i ònó mbe kù co ta yo me tí kpokèjì mì Banga-Ngú-Có mì Bìndi-Mbíri lá nò. Tacó wàa, ye kpétí má ya gí mì yo kà lá, ye 'ví dù me 'dú kù 'di có tí yo, máa, yo kù rò tíyò tí ndâ 'dakò ta có mì yo ká gbaànjé kù konì tí yo tacó bà ɾu ndi kpokèjì mì Banga-Ngú-Có.

²⁸ Yo 'ví cì gúku tí ndâ mbe kù jòò gbí có ta yo tacó bà 'visì muu yo 'do tí kpokèjì mì Bìndi-Mbíri nò lá. Yo dù ta o 'dáá gî ká tí ndâ yú 'dakò. Bà eṛe gba có mì yo gbaànjé nò 'ví dù ji ndú tí seṛè,

náa Mbíri bàkà tacó bà tùbà bà mù ndú ji ndú, káa à 'ví dù tí i bà tùbà ji yo éno máa, yo bà dù tí ndâ 'vâlá.

²⁹ À wu ji yo sàà gî, máa, yo bà dù me ká tí ndâ mbe ùnje gítí Bindi-Mbíri cuki lá. Yo delè bà mbu muu wó.

³⁰ Yo kpónó yuu tí yo mí gbí gó tí nó náa yo táánò òò ye kú gò nó gî. Ye delè kpónó kpòò kú gò káa gó, á go có tí nò náa yo kú 'di nò.

2

Bà si tí Bindi-Mbíri tí i lá

¹ Bà 'vala ta ɾè mì Bindi-Mbíri dú má káa i ònó mbe kú je wotí ji yo, bà zè yo nìkì maa mì Bindi-Mbíri dú má káa i mbe kú yìi yo, gbèe Bèri tí nó mì Mbíri nó má kuu gbí njembí yo 'dáá gî, njembí yo dú má káa 'dê njembí, tí njembí ndâ mbe òò yê ɾo 'duù,

² yo tò muu líkí'o tí nó tí ye nó ta bà koɾo gbèe có. Yo 'vala toko gbaànjé ta tó njembí yo. Nderè bà 'vala yo ta ɲa bà koɾo có mì yo 'ví dù ká gbaànjé.

³ Yo 'ví tò kii gbí òkò tí yo lá. Yo delè 'ví bàkà 'viya gbí òkò tí yo lá. 'Bí 'duù gbí òkò tí yo 'ví bàkà tí wó máa yì ma nò ji ndâ 'bí ka wó lá, yí 'ví si ndâ 'bí ka wó ta o 'dáá gî tí ndâ kpóló-kpolo 'duù ndii yí gî.

⁴ Duù 'ví koɾo có me ká gítí miɾi wó cuki lá, yí 'ví koɾo có gítí ndâ 'bí ka wó.

⁵ À 'ví dù gbí muu yo káa gbèe ɲa có tí nó gbí muu Bindi-Mbíri tí Jézù nò:

⁶ Tú Jézù táánò a tú Mbíri,

káa yí zèè có gítí bà dù yí tí Mbírì nò me
kácá-kácá lá.

⁷ Yí gii jee bà dù tú wó tí tú Mbírì nó mí to,
yí gii je tú bòò.

À gii jò yí je cè kózò tí ndâ 'duù.

⁸ Yí mâ gii 'de tú wó tí tú 'duù,
yí gii si tí wó tí i kùro Mbírì lá,
ta bà 'di có mì Mbírì gí mì ku,
náa à kpétí káa bà cì yí mí tí njèèkpè mù,
yí gii ùnje gítí gí.

⁹ Tacó éno, Mbírì gii te yí ngéé gí yaà,
bìndi yí gii gbì ẹ̀ ẹ̀nínó mbe wu co tí ndâ 'bí
ẹ̀ ẹ̀ 'dáá gí nó mí muu wó.

¹⁰ Tacó wàa, ndâ i tàrì,
ta ndâ i muu to tí nó,
ta ndâ i tà to 'dáá gí 'ví ùlù ẹ̀ Jézù.

¹¹ Delè tacó wàa, ndâ 'duù 'ví 'dè có ta nje ndú
gbí ẹ̀ ndâ nje có 'dáá gí,
máa, Bindi-Mbírì tí Jézù a Mbe tí ndoo,
tacó bà wu ta ẹ̀ Mbírì tí Bu ndoo.

Bà tòngbàà go ngba'o muu to tí nò

¹² Yo 'do sàà káa ndâ mbe kù 'di có mì ye ta o
'dáá gí, ndâ tó 'duù mì ye. Káa yo 'ví dù tí ndâ
mbe 'di có mì ye nò me ká ta o tí nó náa ndoo
má kuu ta ndoo a bà gbèè to nó lá. Yo dù kácáá
nje nèté, tacó bà 'vala mịri yo 'do gbí vò i ta 'dì
á nje yo wálá.

¹³ Tacó a Mbírì ká kù bàkà nèté gbí njembí yo,
tacó wàa yo 'ví dù ta go bà bàkà i tí nó mbe kù
peteke tàkòcò wó nò.

14 Yo 'ví bàkà ndâ i 'dáá gî me ta bà 'dè ngùrù-
ngùrù có lá. Yo delè 'ví bàkà ndú me ta bà 'dè
kolòwò lá,

15 tacó wàa, yo 'ví tù ta bà tí yo tí ndâ yê ta
vò i mì yo wálá, ta njembí yo ngbáràngà'i, tí ndâ
'viì mì Mbírì ta bà lê tí yo wálá, gbí òkò tí ndâ
vóló-volo 'duù tí nó kpónó mbe kù co tí lókó-loko
kpokèjì nò. Yo koṛo muu yo éno máa, yo kù 'vala
gbí òkò tí ndú go ngba'o.

16 Yo zèè có tí nó mbe kù je 'válá ji yo nó tí
kpoò. Tacó wàa, à má wúnò ta o bà co ɾi tí nó
tí ɾi bà gí Bìndi-Mbírì gí bà waa có nó, ye 'ví cè
ta cè-'bì éno máa, ye táánò ì me kù ngèlè lá. Ye
delè ka wu'o me sínò lá.

17 À kpêtí kpónó má 'dè có éno máa, à ci mbelè
ye ji Mbírì á go bà ci njembí yo ji yí nò, tàkòcò
ye bà peteke gî. Có gbí njembí ye delè éno máa,
tàkòcò yo 'ví peteke á go bà peteke tàkòcò ye.

18 À má éno, tàkòcò yo delè 'ví dù pétékè'i, wàa
tàkòcò ndoo 'dáá gî 'ví peteke toko gbaànjé.

Ndâ Tìmatéyò ta Èpàfòròdíù

19 Ye kù koṛo có lì mítí Mbe tí ndoo Jézù éno
máa, yí 'ví si ye 'ví tuu Tìmatéyò ya tí gí mì yo
kà gálà, tacó wàa ye má 'di vò ña ñinó náa à tí
yo kà nó gî, njembí ye 'ví ki ta tí to.

20 Ye ñò 'bí 'duù káká'i ta tó njembí wó, mbe kù
koṛo có ta njembí wó gbaànjé gítí yo bìndi wó,
wàa ye 'ví tuu yí ji yo nò lá,

21 tacó ndâ 'duù mì ze kàá 'dáá gî kù bàkà káa
ndâ 'dóó nèté mì ndú. Ndú kù bàkà me ndâ nèté
mì Jézù lá.

²² Káa yo ta kpéetí yo nò ni gî máa, Tìmàtéyò me có 'dì lá. Yí kù bàkà nèté toko ta ye gítí Banga-Ngú-Có, go 'vii mbe kù bàkà nèté ta bu wó.

²³ À má énnò, ye má nò ña ñinó náa à tí ye nó gî, ye ngé kù tuu yí ji yo.

²⁴ 'Dóó ye ta miři ye ngbá kù koṛo có bà ya gí mì yo kà, náa Mbe tí ndoo má je nó ji ye gí nò.

²⁵ Káa à kpétí ká énnò, ye kù koṛo có énnó máa, bà tuu Èpàfòròdítù mì ye ji yo a kpóló-kpolo có ngé ndii gî. Yí a ná'vindí ye, yí a ka nèté mì ye, yí a ka ye àsikéřì, yí delè a 'duù tí nó náa a yo táánò ká tuu yí gí tí, tacó bà kpolo tí ndâ 'bí i ñinó náa à tí nó tacó tí ye.

²⁶ Ye kù tuu yí ji yo, tacó kô'o tí yo tí wó ngé. Njembí wó delè wálá ta go bà nò yo, tacó yo 'dì có sé'i tí nó táánò mbe bàkà yí nó gî.

²⁷ Sé'i tí nó dú me yí tí vò bà i. Yí nò ndâ ku ta ro wó, káa Mbířì giì nò yê ro wó gî. Tacó bà cì yí táánò bà zi a ndi mbugo tí nó náa ye kpónó kuu gbí nò.

²⁸ Ye kù tuu yí ji yo gálà tacó wàa njembí ye 'ví 'dèè tí gàà, wàa njembí yo delè 'ví 'dèè ta bà nò yí.

²⁹ À má énnò, yo te wiři mítí wó ta líkí'o tí yo. Yo tégàrà ña ndâ 'duù ñinó go yí nò tí kpoò,

³⁰ tacó yí táánò nò ndâ ku ta ro wó tacó bà bàkà nèté mì Mbe tí ndoo. Yí delè giì yuu miři wó mí gbí kpalà kù koni ta ye tacó tí yo.

3

Cèe kpokèjì 'válá mì ndâ mbe kù kili ta rẹ̀ mì Bìndi-Mbířì

¹ Ndòngbú có mì ye jì yo go éno máa, yo dù ta tàkòcò yo pétékè'i tacó yo a ndâ 'dóo ñinó mì Mbe tí ndoo, ndâ ná'vindirí ye. Bà cu wáràgà jì yo káká'i gítí gbèe ndâ i tí nó me nètè mbe te ríki mí gbímí ye lá. Káa àá bà dù a nètè tacó bà kpolo tí yo.

² Yo kpolo tí yo 'do tí ndâ bô tí nó tí ndâ mbe bàkà vò i, tí ndâ mbe kù waaka nje kú tí ndú nò.

³ Tacó ndoo me go ndú lá. A ndoo ká ya gí gbí cèe gázâ, a ndoo ká kù bàkà i-Mbíri ta wotí mì Bèri-mi-Mbíri. Ndoò delè kù cè cè-'bì a i ta rẹ̀ mì Bìndi-Mbíri tí Jézù, ndoo tee njembí ndoo mítí dī ndoo lá.

⁴ Ta ndâ ña ñinó 'dáá gí, àá kùtàá bà dù á mì ye a nderẹ̀ tacó bà tee njembí ye mítí dī ye. 'Bí 'dakò má 'dè có éno máa, àá mì yì a nderẹ̀ tacó bà tee njembí yì mítí dī yì, nderẹ̀ mì wó nò bà ndii nderẹ̀ mì ye wálá.

⁵ Tacó à má gítí ye, à ya ta ye gí gbí gázâ ta sili bìndi bà jò ye vò-nje ta'ò, go i gbí tàkìì mì ndâ Jùdèyà gí. Ña ye a Ìzìrìyélì, tí 'vii kòtí Bènjámínò, tí Ìzìrìyélì gbúú-gbuu, náa ndâ bu ye ta nawu ye só káa ndâ Ìzìrìyélì. À má gítí có bà rù ndi tàkìì mì ndâ Jùdèyà, ye táánò a mbe kpolo tí tàkìì mì ndâ Jùdèyà

⁶ À má gítí có bà tì muu tàkìì mì ndâ Jùdèyà, ye táánò a mbe kù mèèkè'i tí ndâ mbe kù kili ta rẹ̀ mì Bìndi-Mbíri. À mà gii gí gítí có bà co jáá tí kpokèjì mì có mì Mòze, bà lè táánò tí ye gbaanjé wálá.

⁷ Ye táánò sàà kùro bà 'de tí ze ta Bìndi-Mbíri kù si ndâ i tí nò tí ndâ tó i mbe konì ye, káa ye

kpónó giì nò ni gî máa, ndú a ndâ i mbe kû ya ta ye gí nje vò i.

⁸ Ye kpónó nò 'bí i gbaànjé 'do gbí òkò tí ndâ i tí nò 'dáá gî ɾo ye tí i mbe koni ye lá, tacó ye nò Bìndi-Mbíri tí Jézù tí Mbe tí ye ni ngé ndii gî. Ye ùnje gítí bà bè gbí ndâ i 'dáá gî tacó tí wó gî. Ye kpónó kû nò ndâ i ɾo ye 'dáá gî ká go ndâ zùkùmèè, i gbí bà nò Bìndi-Mbíri ni mì ye ndii i gbí ndâ i 'dáá gî gî; ye delè giì nò ndâ i ɾo ye 'dáá gî tí i lá,

⁹ tacó wàa ye 'ví 'de tí ta bàndò bà dù ye ngbé mì ze ta Bìndi-Mbíri. Ye kû pà me 'dóó kpokèjì mì ye, tí kpokèjì tí nó mbe si ye kû ɾu a ndi có mì Mòze, tacó wàa ye 'ví dù tí tí 'duù jáá kùɾo Mbíri nó lá. À tí ye kpónó káa go bà dù tí 'duù jáá kùɾo Mbíri 'do gbí bà tee njembí ye mítí Bìndi-Mbíri. Nìnò a ɲa kpokèjì bà dù tí 'duù jáá kùɾo Mbíri, mbe 'bì 'do tí bà tee njembí 'duù mítí Mbíri.

¹⁰ Ye kùtáá má nò Bìndi-Mbíri ni go có tí nó gbí njembí ye nó gî! Ye má nò wotí tí nó mbe 'vala yí 'do gbí muu'dú wó nó ni gî! Ye má kònò ɲa bà kònò sé'i tí nó náa yí táánò kònò nó, bìndi ye 'ví cì ɲa ku mì wó nò gî, 'bí có mì ye bà dù káká'i wálá.

¹¹ Nìnò a kpokèjì tí nó náa ye kû koɾo có gítí bà 'vala ndi ye 'do gbí muu'dú ye go i mì Bìndi-Mbíri lì mítí nó ká nò.

Bà ya ndíri gítí i ònó náa a tí

¹² Ye kpónó kû bàkà me tí ye, máa, bà lê cee 'do tí ye gî nò lá; ye kû kpòkò a tí ye tacó bà 'de tó i tí nó náa Bìndi-Mbíri zèè ye tí 'duù mì wó, wàa ye 'ví dù go yì nò.

13 Ye kù bàkà me tí ye, máa, ye 'de i tí nò gí nò lá, ndâ ná'vindí ye. Káa gbèe i ñìnó náa ye kù bàkà nó a bà ò-bà-mbí ndâ i ñìnó mbe ndii gí nò. Ye kpónó kù bàkà wotí a i gítí ndâ i ñìnó kùro ye nò.

14 Ye kù jòò tí ye a i gítí bà ya gí kùro tacó bà yee tà é tí nó mì Mbírì, náa yí kù tè ta é tí ndoo ta rẹ̀ mì Bìndi-Mbírì tí Jézù gítí 'válá tí nó gbírì nò.

15 Ñìnò a có náa à 'ví dù gbí muu ndoo tí ndâ 'duù ñìnó ta gbí dìi ndoo mbe yù gí nó ká nò. Káa ndâ 'bí có mbe co tende má kuu gbí muu yo, Mbírì bà 'dè gbí ndú ji yo gí.

16 Káa ndoo 'ví ɾu káa ndi kpokèjì tí nó náa ndoo kpónó kuu tí nò.

17 Yo mèlè ndi ɾa 'válá mì ye nó toko gbaànjé, ndâ ná'vindí ye. Yo delè 'ví kpolo ɾo yo mítí ndâ 'duù ñìnó mbe kù 'vala go ñìnó náa yo ɾò 'do mì ze nò.

18 Ye 'dè có tí nó ji yo 'vìlì-'vìlì, káa ye kpónó kù bùù nó a gbí ndí ta ngo-ɾo tà ɾo ye ji yo, máa, a ɾa bà 'vala ndâ 'duù me mbè ká kù njèè gbí òkò tí ndú ta njèèkpè mù mì Bìndi-Mbírì.

19 Ndòngbú i tacó tí ndâ mbe kù 'vala gbí ɾa kpokèjì tí nó káa bà mì ndú. Mbírì mì ndú káa i-zó-zò. Ndú kù cè cè-'bì ká ta rẹ̀ ndâ i-nò mì ndú náa ndú kù bàkà nò. Njembí ndú delè ká tí ndâ i muu to tí nò.

20 Káa à má gítí ndoo, 'bá mì ndoo a i gbírì. Mbe 'vala ndoo, tí Mbe tí ndoo Jézù tí Bìndi-Mbírì bà gí a i 'do gbírì. Ndo kpónó léngé-lenge kù ù nó a ndi bà gí yí

21 gí bà 'vìsì jò'dókò dìi ndoo tí nó tí i mì ku nó tí wu dìi á go dìi wó, á ta wotí tí nó mbe si yí 'ví dù tí Mbe tí ndâ i 'dáá gî nô.

4

Páwòlò kpo-gbí-tà-tù ndâ mbe kù kili ta òrè mì Bìndi-Mbíri gbí gbata Filípi

¹ À má ènò, yo tí ndâ ná'vìndí ye, ye zè yo nìkì ma, kô'o tí yo bà zi ye gí! Yo a ndâ mbe kù peteke tàkòcò ye! Yo a ndâ mbe kù njè muu ye! Yo tee njembí yo mítí Mbe tí ndoo tí kpoò, ndâ tó kómbe ye.

² Ye kù 'deke tí ye jì ndâ Èvódiyà ta Síndìkè máa, ndú 'viindi gbí òkò tí ndú ta òrè mì Mbe tí ndoo.

³ Ye delè kù 'deke tí ye jì wò tí Sìzìgúsù tí 'dóó ka ye mbe te kòrì á go gbí òrè lo tí nò, máa, wò 'ví konì ndâ nì tí nò náa ye nì òrè ndú sósò'ò nò, tacó a ndú táánò ká òrè tíyò seè tí ye gbí gó muu Banga-Ngú-Có, ndú sósò'ò nò, gii je Kèlèméndè, gii je ndâ 'bí ka nètè mì ye 'dáá gî. Òrè ndú nò 'dáá gî kù gbí wáràgà mì ndâ 'válá.

⁴ Có gbí njembí ye jì yo éno máa, yo 'vala ta Mbe tí ndoo ta pètékè tàkòcò yo. Ye bà bùù gbí ndi có tí nò jì yo. Có mì ye jì yo éno máa, yo dù ta pètékè tàkòcò yo.

⁵ Yo 'ví 'vala ta ndâ ña ndâ 'duù 'dáá gî ta tó njembí yo, tacó Mbe tí ndoo kpónó-kpónó kèjì.

⁶ Njembí yo 'ví mù tacó 'bí ña i ngé gî lá. I má mì yo wálá, yo 'ví 'deke tí yo jì Mbíri, yo tù 'bì yo jì yí, yo 'deke òrè ndâ i tí nó náa ndú mì yo wálá nó jì yí, yo 'dè nìkì maa jì yí.

⁷ Bìndi ña 'dê njembí tí nó mì wó tí Mbíri nàa ña mì 'bí 'duu muu to tí nó ngé gî wálá nó 'ví kpolo tí njembí yo, yí delè 'ví kpolo tí bà koṛo có mí yo tacó yo a ndâ ñinó mì Bìndi-Mbíri tí Jézù.

⁸ Ndòngbú có mì ye ji yo éno máa, yo 'ví si à 'ví yè gbí njembí yo káa yúco, ndâ ná'vindí ye. Yo si à 'ví dù gbí muu yo káa cèe có, ta có ñinó jáá, ta có ñinó tí tó có, ta ngbáràngà có, ta tó rè. Yo 'ví koṛo có ká gítí ndâ i ñinó mbe 'vii tí ndâ i nàa à 'ví ùlù ndú nô.

⁹ Yo ya gí kùro ta bà bàkà ndâ i tí nó nàa yo táánò tala bà bàkà ndú 'do mì ye, ta ndâ i ñinó nàa ye ñibà ndú ji yo nô. Yo bàkà go ndá có ñinó nàa yo 'di 'do gbí nje ye, ta ndâ i ñinó nàa yo táánò ñò ye kù bàkà nô, bìndi Mbíri tí mbe je 'dê njembí ji yo bà si yo 'ví dù ñikì maa dúú bà ya tí .

Páwòlò 'dè ñikì maa tacó ndâ i-nambeè nàa à je ji yí

¹⁰ 'Bí có mì ye tacó bà 'dè ji yo a ñinó máa, tàkòcò ye peteke gítí yo tacó bà konì ye mì yo ngé ndii gî. Tàkòcò ye delè gii peteke gítí Mbe tí ndoo ngé ndii gî, tacó yo kpónó 'bìtà bà koṛo có gítí bà tù 'bì yo ji ye káká'í gî. Yo táánò kù koṛo có tí ye, káa a i nàa yo 'de kpokèjì bà túbà tí yo tí gí sè lá.

¹¹ Ye kù 'dè có tí nò me tacó máa ye kù ce a cèle yê tí ye á ji yo nò lá. Tacó ye ni bà 'vala miri ye ta ña i ñinó nàa à kuu mì ye nó gî.

¹² Ye ni bà 'vala gbí yê gî. Ye delè ni bà 'vala gbí dà gî. Ye a ká gázâ, ye ñò tiṛi gítí bà 'vala tí ndâ bàndò 'dáá gî ni gî. Ye gii ñò tiṛi gítí bà 'vala

gbí tó o, ta bà 'vala gbí vò o ni gî. Ye má ta yéni, có mì ye wálá. Ye delè má ta go tí ye, có mì ye wálá. I má mì ye wálá, ye nò l'vì gítí bà 'vala ye gî. I delè má jee tí mítí ye á to, ye nò l'vì gítí bà 'vala ye delè gî.

¹³ Wotí bà bàkà ndâ i 'dáá ta ɾè 'Duù tí nò mbe je wotí á ji ye nó kuu tí ye.

¹⁴ Kpêtí ká éno, yo táánò bàkà ji ye a nambeè, náa yo konì ta ye gbí vò i tí nò mbe 'de ye, náa ye kpónó tí kuu gbí zàà nò.

¹⁵ Yo tí ndâ 'duù gbí gbata mì Filípo nò ta kpéetí yo ni gî, máa, ta o tí nó náa ye táánò kù njè nó 'do gbí to Mèsidóniyà ta o bà 'bità bà ma Banga-Ngú-Có mì ye kà nó, ndâ 'bí mbe kù kili ta ɾè mì Bìndi-Mbíri 'do bà 'bí to jé mbe tù 'bì ndú ji ye, máa, «À nò» káa ye giì l'ì 'bì ye gí tà 'bì ndú gí nò, wálá. Áá táánò káa yo ká kù nò yê tí ye.

¹⁶ Tacó à kpêtí ká ta o tí nó táánò náa ye tí kuu gbí gbata Tèsalónikà nó, ye kì 'bì ye gítí bà konì ye mì yo yee gbí sósò'ò.

¹⁷ Gbí có tí nò me éno máa, ye kù mòkò a tàkò i-nambeè nò lá; ye kù mòkò a tàkò i nìnó mbe kù jò mboo ji yo nò.

¹⁸ Ndâ i nìnó ta go ndú tí ye nó kpónó 'dáá gî kuu mì ye. Yì ye kpónó yè ngé yee tàkòcò ye. Tacó ndâ i-nambeè tí nó náa yo tuu ta Èpàfòròditù á ji ye nó yee tí ye gî. Ndú go ndâ i ta banga pó ndú, náa à kù ci ji Mbíri, tí ndâ i-cí-ci mbe nìkì tí Mbíri, náa yí l'ì 'bì wó gí tà ndú gî.

¹⁹ Mbíri mì ye bà ko mboo nambeè mì yo náa yo bàkà ji ye nò ji yo me gbolò ta ɾè mì Bìndi-

Mbíri tí Jézù, tacó Mbíri kù 'va 'bì wó ká mí gbí i.

²⁰ À ùlù Mbíri tí Bu ndoo kpòò ya tí . Go-i-tí-nò.

Ndòngbù bà 'vee 'vé mì Páwòlò

²¹ Ye 'vee ndâ 'duù ònó mì yo kà tí ndâ tó 'duù mì Mbíri nó gbaànjé-gbaànjé 'dáá gî. Ndâ ná'vindí ndoo ònó mbe kù dù toko ta ye kàá nó delè 'vee yo ma.

²² Ndâ 'duù mì ze kàá 'dáá gî, 'dóó ndâ 'duù 'bá mì ngáángbá gba mì ndâ Ròmánò, 'vee yo ngé ndii gî.

²³ Ye kù 'deke tí ye ji Mbíri máa, nambeè mì Mbe tí ndoo Jézù tí Bìndi-Mbíri 'ví dù gbí njembí yo 'dáá gî.

Ndogo
Ndogo: Ngú bà toko nambeè m̀ Mb̀r̀ ta nd̃ 'dù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa